



ՀԱՅՐԱՊԵՏԱԿԱՆ «ՀԱՅԿԱԾԷՆ»
ԱՄԱՌԱՆՈՑԱՅԻՆ ԾԵՆՔԻ ՀԻՄՆԱՐԿԵՔԻ
ՕՐՀՆՈՒԹՅՈՒՆ ԲՅՈՒՐԱԿԱՆՈՒՄ

Հունիսի 14-ին, շաբաթ օրը, առավոտյան ժամը 12-ին, հանդիսավոր իրադրության մեջ և խանդավառ մթնոլորտում և օրհնությամբ Վեհափառ Հայրապետի կատարվում է Աշտարակի շրջանի Բյուրական գյուղում հայրապետական «Հայկաշեն» նոր ամառանոցային շենքի հիմնարկերը:

Ամառային պայծառ առավոտ է: Գերագույն հոգևոր խորհուրդը, Մայր Աթոռի միաբանությունը, մայրավանքի պաշտոնեությունը, Մայր Աթոռին առընթեր ճարտարապետական հանձնաժողովի անդամները, հոգևոր ճեմարանի դասախոսներն ու լսարանների ուսանողությունը ինքաշարժով մեկնում են Բյուրական՝ ներկա լինելու հանդիսությանը:

Դեպի Բյուրական տանող ճանապարհի եզրերին բազմաթիվ հավատացյալներ անհամբեր սպասում են Ն. Ս. Օծույան ժամանելուն և ապա իրենց որդիական հարգանքը մատուցում Ամենայն Հայոց Վեհափառ Հայրապետին:

Ամառանոցի կառուցվելիք շենքի հողամասը սիրով տրամադրել է Հայոց Հայրապետին հայրենի իշխանությունը: Հողամասը գտնվում է Բյուրական գյուղի վերին մասում, Արագածի գեղատեսիլ, գմբուխայա լանջին: Հողամասի երկու կողմերից ձորն են զահավիծում երկու փրփրադեզ գետակներ: Ամենուրեք ծաղիկներ, թռչունների ճուղիչուն, կենարար օդ, սառնորակ ջրեր: Բյուրականը Այրարատ աշխարհի Արագածոտն գավառի ամենամեծ գյուղն է եղել,

որի մասին առաջին անգամ հիշատակում է Ժ դարի սկզբին Հովհաննես Դրասխանակերտցի կաթողիկոսը:

ԺԵ դարում Մկրտիչ անունով մի քահանա Բյուրականում ընդօրինակել է «Յիսուս որդի» գիրքը, որի հիշատակարանում նշում է, որ այս գյուղում կան մենաստաններ՝ ս. Աստվածածին և ս. Հովհան եկեղեցիներով:

1874 թ. Գևորգ Դ կաթողիկոսը այստեղ կառուցում է հայրապետական ամառանոց:

Ն. Ս. Օծույանը Իր շքախմբով ժամանում է հայրապետական ապագա ամառանոցավայրը: Բազմաթիվ մեքենաներ ու բանվորներ, շինարար վարպետներ աշխատում են, փորում շենքի հիմքերը:


Ամառանոցի նախագիծը պատրաստել է անվանի ճարտարապետ և Մայր Աթոռի ճարտարապետական հանձնաժողովի անդամ Ռաֆայել Իսրայելյանը:

Հավատացյալների, մտավորականների և շինարար-վարպետների խումբը ջերմորեն շրջապատում է իր Վեհափառ Հայրապետին:

Հայրապետական ամառանոցը կառուցվում է ամերիկահայ ծանոթ ու հարգված ազգային և Մայր Աթոռի բարերար տիսր Հայկ Գալուքճյանի նվիրատվությամբ:

Հանդիսությանը ներկա են նաև ՀԱՍՀ Միևիստրների տվետին առընթեր հայ եկեղեցու գործերի խորհրդի նախագահ Կ. Դալլաբյանը և տեղակալ Ս. Հովհաննիսյանը:

Սկսվում է հիմնարկերի օրհնությունը: Վեհափառ Հայրապետի կարգադրությամբ





Վեհափառ Հայրապետը հիշատակարանը ամփոփում է «Հայկաշեն»-ի հիմքում

պատրաստվել էր հետևյալ հիշատակարանը, որը դրվելու էր, ըստ հայկական սովորության, նորակառույց շենքի հիմքում.

Ֆիշատակարան

Ի Հայրապետության Տեառն Տեառն Վազգենի Առաջնոյ կաթողիկոսին Ամենայն Հայոց, կառուցաւ հայրապետական հովոցս ի լեռնակողման Բիրականայ գեղջ, արդեամբ եւ ծախիւք կ. պոլսեցի ամերկաբնակ Հայկ Գաւուքնեանի, վասնորոյ կոչեցաւ հովոցս՝

«Հայկաշեն», ի յիշատակ հանգուցեալ ծնողացն իւրոյ, եւ ի վայելումն հարչապետացն Ամենայն Հայոց, եւ միաբանիցն Մայր Աթոռոյ սրբոյ Էջմիածնի:

Ֆիշատակն բարերարին օրհնութեամբ եղիցի. ամէն:

Ի 14-ն յունիսի 1969 ամի:

Այս հիշատակարանի վրա ստորագրում են՝ Վեհափառ Հայրապետը, Մայր Աթոռի միաբանները, ճարտարապետ Ռ. Իսրայելյանը, շինարարները և ներկաներից շատերը: Ապա հիշատակարանը դրվում է ապակե սրվակի մեջ, զմուսվում և Հայոց Հայրապե-

տի օրհնությամբ տեղադրվում է շենքի հիմքում:

Սկսվում է հիմնարկների օրհնության արարողությունը. «Ի վերայ վիմի հաստոյ շինեցեր զքնակարանս այս, զսա պահեա ի խաղաղութեան»: Մայր Մաշտոցից քաղվածաբար կարդացվում են հիմնարկի վերաբերյալ ս. գրական ընթերցումներ, համապատասխան երգերով, և վերջում՝ «Էջմիածինն ի Հօրե» շարականը: Արարողությունը վերջանում է Վեհափառ Հայրապետի «Պահպանիչ»-ով և միաբերան երգված «Հայր մեր»-ով:

Այնուհետև բոլոր ներկաները հյուրասիրվում են հայկական կոնյակով և քաղցրավենիքով՝ քարեմաղթություններ անելով հայրապետական ամառանոցի հաջող և շուտափույթ կառուցման համար:

Վեհափառ Հայրապետը խոսք առնելով այս ուրախ ու պատմական առիթով, ասում է.

Նախ Մեր խորին շնորհակալությունն ենք հայտնում մեր հայրենի բարեխնամ կառավարությանը, որի թույլտվությամբ

և արտոնությամբ ստացանք, այս երկու հեկտարանոց հողակտորը՝ «Հայկաշեն»-ը կառուցելու համար: Այնուհետև Մեր շնորհակալությունն ենք հայտնում բոլոր այն ղեկավար մարմիններին, որոնք այս գործում օգտակար եղան և պիտի լինեն մեզ: Մենք՝ որպես հայ եկեղեցու Պետ, օրհնում ենք մեր տաղանդավոր, աշխատասեր և շինարար հայ ժողովուրդը, որի կառուցողական հանձարը հայտնի է ողջ մարդկությանը: Թող միշտ շինի, կառուցի մեր ժողովուրդը և շենացնի մեր մայր հայրենիքը:

Ապա Ն. Ս. Օծությունը Իր խոսքն ուղղելով «Հայկաշեն»-ի շինարարներին, բանվորներին, օրհնում է նրանց աշխարհաշեն, պատվավոր գործը, ցանկանում է բոլորին քաջաոգոջություն, ձեռնարկած գործի բարեհաջող ավարտ:

Ժամը 13-ին Վեհափառ Հայրապետը հրաժեշտ տալով բոլոր ներկաներին, հոգեպես մխիթարված ու բարձր տրամադրության մեջ, Իր շքախմբով վերադառնում է Մայր Աթոռ:

